



Rabu, 24 Mei 2023
Ogen: Markus 16:1



Nukur Rempah-Rempah



Ibas kerina budaya-budaya i doni enda, erbage-bage kebiasaan si lit ibas kerina perdalanen kegeluhen. Menaken kin anak tubuh, lit tradisi si arus ilakoken man bana. Kencambelin ras erjabu, erbage-bage kebiasaan ibas sada budaya siilakoken man bana, janah enda jadi sada keuniken dingan arus iergai. Termasuk she kugas paksa kematn, menaken tradisi penguburen bagepe kenca sie. Adi ibas kebiasaan kalak Karo lit me naruhkan bunga, tanda kehamaten ras keleng ate.

Bagenda me Maria Magdalena, si setia ngikutken Jesus la saja sedekah pelayanen tapi pe ibas paksa kiniseran she ku kematenna. Kenca Jesus ikuburken tetap ia rukur ras nikapken kai siarus ilakoken nandangi mait Jesus. Alu tetap ngikuti tradisi Sabat, emaka kenca enggo lepas wari sabbat ersikap ia nukur erbage bahan rempah ras si merim guna mait Jesus. Labo nari nterem kalak si mediate, ngukuri ras nikapken kai siarus ilakoken nandangi mait rikut tradisi kalak Jahudi. Tapi Maria Magdalena ras piga-piga kalak nari la lupa ngelakokenca man Jesus. Ertina kai sibiasa ilakoken keluarga nandnagi anggota ntah teman ras kade-kadena dikune ia mate, ilakokenna. Enda ngatakenca maka ia me kerina jadi keluarga Jesus. Tanggungjawab ras keleng ate, enda me si jadi alasen man Maria Magdalena maka nukur ersura-sura ndahi ras namaken minak ku mait Jesus.

Arah kai siilakoken Maria Magdalena, tangkas teridah ia sebagai sada anggota keluarga, senina ras turang Jesus, sindalanken kataNa. Bageme iajuk Moria GBKP, kita kerina tetap ncidahkan ras ndalanken dahin kekelengen la saja man saph-saph kita. Arah e teridah kita mediate nandangi kerina dahin keleng ate, la saja ibas peradaten tapi pe ibas kiniteken. La mbiar ncidahkan kekelengen e amin lit tantangan si nimai.